

QK 325/2

v. Tossen

Z
f
1235



Christliche Leichpredigt/

Wey der Begreb-

nis/ der Edlen vnd Viel Ehrentu-
gentsamen Frawen SIBYLLEN, geborner

von Ledaw/ Des auch Edlen/ Bestrengen vnd Ehr-
vesten Wolfffen Tossen zu Wolhausen/ herge-
liebten Hausfrawen/ welche den 12. April:

umb 8. Uhr/ auff den Abendt/ in
Christo Seliglich ent-
schlaffen/



Behalten



Zu Neufkirchen/ den 18. Aprilis, dieses
1606. Jahrs.

Durch

M. Nicolaum Hannold Selbensern,
Pfarrern doselbst.

X 2124956


Gedruckt zum Hof/ durch Mattheum
Pfeilschmidt/ Im Jahr 1606.



Faint, illegible text, likely bleed-through from the reverse side of the page.

Fragment of text from the adjacent page, including the letters: **on**, **B**, **G**, **h**, **f**, **s**, **w**, **k**, **Q**, **d**, **z**, **r**, **v**, **f**, **E**, **f**, **a**, **i**.





Ir sind jeko / Geliebte in dem
 HERN Christo / nach dem gnädigen
 vnd allein guten Willen vnd Wolges
 fallen Gottes / anhero zusammenkom
 men / bey der Leich / weiland der Edlen /
 vnd Vielehrntugentsamen / Christlichen Frayen S I
 BYLLEN, Geborner von Tedarw / Des auch Edlen /
 Gestrengen vnd Ehrvesten Wolffen Tossen zu Wol
 hausen / Hertzgeliebten Hausfrayen / welche nechstver
 flossens Sonnabents / den 12. April : auff den Abendt /
 sanfft vnd seliglich im HERN entschlaffen. An dero
 wird vns ein Exempel vnd Spiegel vnserer Sterblig
 keit vnd nichtigkeit diß Lebens für die Augen gestellet.
 Will vns demnach als Christen aller dings gebüren /
 daß wir in Gottseliger Betrachtung dessen / vns bey
 zeiten zu einem seligen Sterbstündlein schicken vnd be
 reiten lernen / Auff das wir Heut oder Morgen / wenn
 vns Gott der HERN / der vnser aller leben vnd sterben in
 seinen Händen hat / durch seinen Kammerboten / den
 Todt / auffgebieten wird / mögen gerüst vnd bereit er
 funden werden / einen seligen vnd frölichen Schritt /
 aus diesem elenden Jammer vnd Zehrenthal zu thun /
 in den herzlichhen himlischen Freudensaal / da Freude die

Pfal: 31.

Job: 14.

Pfal: 16.

A ij fülle /

fülle/ vnd lieblichs Wesen zur Rechten Gottes ist/ im-
mer vnd ewiglich.

Solches aber kan nirgents hero besser geschehen/
denn auß heiliger göttlicher Schrift/ die wir dan auch
hierüber jzt wollen zu rath nemen. Vnd damit es mit
desto mehrern Nutz vnd Frucht beschehen/ Vnd vor als-
len dingen Gott dem Allmechtigen zu Lob vnd Ehren/
Denen hochbetrübtten Adelichen Wittwer/ Vndam/
Frawen Tochter/ vnd nechst Angewandten/ zu Trost/
vnd geistlicher Herksterckung/ Auch in gemein vns als-
len zu Lehr vnd Vnterricht gereichen möge: So wollen
wir Gott den Allmechtigen vmb Gnad vnd Beystand
des heiligen Geistes anruffen/ vnd ein andechtigs glau-
biges Vatter vnser beten/ &c.

Textus.

2. Corinth: 4.

Unsrer Trübsal/ die zeitlich vnd leicht ist/
schaffet eine ewige vnd ober alle maß
wichtige Herligkeit/ Vns/ die wir nicht sehen
auff das sichtbare/ sondern auff das vnsicht-
bare. Denn was sichtbar ist/ das ist zeit-
lich/ Was aber vnsichtbar ist/
das ist ewig.

Geliebten

Liebten in dem **HERRN** Christo/
 dieser heutige Tag/ so wir in gemein den gu-
 ten/oder stillen/oder Gharfreitag pflegen zu
 nennen/ist von alters hero von der Christlichen Kirchen
 außgesetzt vnd verordnet/das man sich daran erinnern
 vnd in warer Gottesfurcht Christlich betrachten soll/
 nicht allein das bittere vñ schmerzliche Leiden vnd ster-
 ben vnser lieben **HERRN** vnd Heilandts Jesu Christi/
 Sondern auch seine herliche Begrebnis/ welche auff
 heutigen Tag/ fast vmb dise zeit/oder je ein wenig her-
 nach/ geschehen ist. Daher vns viel schöner Lehr vnd
 Trostreicher Text an die handt gegeben werden/die sich
 trefflich wol zu Leichpredigten schicken/vnd draus kreff-
 tiger Trost wider die bitter vnd grausamkeit des kalten
 vnd ungestalten Todes kñnten genommen vnd gegeben
 werden. Aber weil dieselben sonst oft erkleret werden/
 hab ich sie zu disem mal beruhen/ vnd mir an dero statt
 disz jzt abgelesene schöne Lehr vnd Trostsprüchlein/be-
 lieben lassen/Euch/meinen Lieben/dasselbe Simpl vnd
 Einfeltiglich/durch Gottes Gnad fürzuhalten vnd zu
 erkleren/ Alldieweil vnser in Gott wol selige verstorbe-
 ne Frau Töffin vns anleitung dazu gegeben/in dem sie
 schmerzlich darnider gelegen/vnd ihr Trübsal wol ge-
 habt hat/ auch ein sonders gefallen daran/ wenn ihr
 dasselbige in ihrer trübseligen Leibschwachheit vnd
 schmerzen zu Trost ist vorgehalten worden: Vnd dann

A iij

auch

2. Tim: 3. auch mit allen Gottseligen in diesem Leben es dermassen
 Actor: 17. beschaffen / daß sie müssen Verfolgung leiden / Vnd
 durch viel Trübsal in das Reich Gottes eingehen.

Pfal: 75. Denn Gott der H^{er} / einem jeglichen Christen / eis
 nen Trunck aus dem Kelch des Creuzes / oder seinem
 Creuzbecher zu thun verordnet / den muß er bescheid
 thun / den wird auch keiner so wenig abschlagen / von sich
 schieben / oder desselben sich erwehren können / So wes
 nig der Teuffel der Gottseligkeit hold vnd gönstig ist.

Pfal: 34. Vnd solcher Trunck / aus dem Creuzbecher bescheid
 zu thun / wird den Christen nit nur einmal in irem leben
 fürgesetzt / welches wol hingien / Sondern gar oft vnd
 vielmals / welches auch David bezeuget / do er sagt:
 Der Gerecht muß viel leiden. Das ist / Meine Lieb
 sten / so gewiß / daß es niemand in abred sein oder laug
 nen kan. Denn wenn gleich die heilige Schrift nicht
 so hell vnd klar allenthalben davon redete: so gibts doch
 die tägliche erfahrung empfindlich vñ augenscheinlich /
 also / daß ob schon fromme Christen nicht verfolget wer
 den von den gottlosen Tyrannen vnd iren Helffershelf
 fern / so haben sie doch sonsten jr Creuz mannichfaltig /
 vñ gemeinglich am allermeisten / Wenn Gott der H^{er}
 sie aus dieser Welt abfodern vnd zu sich nemen will / da
 geraten sie offtermaln in schwere langwirige Kranck
 heiten / darinnen sie so grosse Schmerzen leiden / das
 es sie nicht allein zu viel dünckt / Sondern auch wol ge
 fundte

sundte Leut sich drüber entsetzen vñ kleinnützig werden.

Darumb ein jedes leicht zuerachten/ daß diß ein son-
dere grosse gut/ vnd wolthat Gottes sein muß/ wenn er
einen frommen Christen/ durch seines heiligen Geistes
sterckung vnd trost/ die gnad thut/ daß er sich nit allein
ob dem Creutz nicht zuhart entsetzet/ sondern auch sich
selbsten mit vnd aus Gottes wort zu trösten weis/ daß
wenn gleich das Creutz/ vnd die darauß entstehenden
schmerken noch so groß/ daß es ime dennoch zum besten
dienen müßte/ Gott werde im auch nit mehr aufflegen/
denn er ertragen kan/ vnd endlich für sein Schmerken vñ
Creutz/ ewige iñerwerende Herligkeit geben/ vnd seine
Trübseligkeit vnd Traurigkeit in ewige Freud verwan-
deln werde. Inmassen wir denn solche grosse Gnad
Gottes an vnserer seligen Fraw Töffin in ihrer weren-
den Kranckheit mercklich gespürt vnd gehört haben/
wie sie sich aus Gottes Wort kondte trösten/ vnd die
schmerken mit sonderer Gedult ertragen.

Rom: 8.

I. Cor: 10.

Johan: 16.

Weil denn/ meine Lieben/ wir nicht wissen können/
was einem jeglichen noch vor seinem Ende hie auß Er-
den begegnen möchte/ So wollen wir zu diesem mal/
vor mittels Göttlicher Gnaden/ vnd seines heiligen
Geistes Hülff vnd Beystandt/ aus abgelesenen wor-
ten diß Stücklein mit einander anhören vnd lernen:
Wie wir vns in die fürfallende Trübsal/
Leibschwachheit/ oder sonst in Creutz oder

Docilitas.

Widerwertigkeit/

Widerwertigkeit / wie sie namen haben mag /
Christlich vnd Seliglich schicken? Wie wir
vns gegen allem Creutz recht gerüst vnd staf-
firt machen sollen / das wirs mit Gedult
tragen / vnd überwinden mögen?

Attentio.

Denn wie nötig solches sey / habt ihr izt allbereit ge-
hört vnd vernommen / das nemlich des Creutzsbechers
niemand verschonet werde / er muß draus zechen / er stel-
le sich dazu oder dagegen / wie er wolle / es schmeckt ihm
oder nicht. Vnd ob vns gleich derselbe izt nit fürgesetzt
ist / auch wir gleich izt ohne Trübsal vnd Creutz / frisch
vnd gesund sein. O meine Lieben / in einem Nu vnd Au-
genblick kan sichs verkeren / vnd Gott weis / was vns
noch heut möchte vnter die hand stossen vnd begegnen /
Vnd wer denn nicht bey zeiten gelernet / wie er sich hal-
ten vnd drein schicken soll / den kombt dasselbe nur desto
seurer an / vnd schmeckt ihm so herbe vnd reß / das es
ihm die Zehren zun Augen heraus druckt. Darumb
können wir / Meine Lieben / gwißlich bessers nichts
thun / denn zeitlich studirn vnd lernen / wie wir vns
dazu schicken vnd bereiten sollen.

Antith:

Da nimbt nun eines das / ein ander ein anders für /
Etliche meinen sie rüsten sich gar wol gegen das Creutz /
Kranckheit vnd Trübsal / wenn sie auff mittel vnd wege
gedencken / wie sie denselben vorkömen vnd es abwenden
mögen /

mögen/ vnd dencken: Zeehe/ je besser. Der schaffet ihm
 allerley Artzney vnd Labsal/ damit er sich wider die
 Kranckheit præservirn, oder darinn stercken möge: Ein
 ander sihet/ wie er ihm ein Vorrath von Gold vnd Geld
 machen möge/ daß er in fürfallenden Creutz/ noth vnd
 trübsal möchte einen Zehrpfenning haben/ Die dencken
 denn/ es könne sie kein Vnglück oder Trübsal oberfals
 len/ sie können vnd wollen mit irem Geld vnd Guth die
 selben lindern/ oder sich ihrer ganz vnd gar erwehren.
 Vnd ist fast keine Trübsal oder Creutz/ dawider nicht
 die Leut durch sonderliche eusserliche Mittel sich gerüst
 vnd gefast machen.

Nun ist's zwar nicht zutadeln noch zuwehren/ daß **Concessio.**
 man ordentliche/ vnd von Gott zugelassene Mittel ge
 brauche/ Za man soll dieselbe bey Leib nicht verachten/
 Denn wer sie verachtet/ wie bißweiln etliche vnbeson
 nene Leut zuthun pflegen/ daß wenn sie sehen die Trüb
 sal oder das Creutz daher gehen/ vnd sie dieselben gar
 wol durch ordentliche Mittel entfliehen oder je lindern
 könnten/ so wollen sie ober alle wunder nicht einen Heller
 oder Pfening / weil sie ihr Hertz gar ans zeitlich ge
 hengenget/ drauf wenden: O der fahrē wol aus thumkühn:
 vnd frecheit zu/ bieten dem herzudringenden Creutz den
 Kopf/ welches sie dermassen drauff schmeißt/ daß sie drü
 ber auff's Kreistbett niderpurzeln/ Vnd ob sie gleich als
 Den vermanet werden/ ordentliche Mittel zugebrauchen/
 B damit

Damit sie desselben losz/oder inen ja gelinder möchte wer-
 den/so sagen sie: Ey was soll ich lang gebrauchen vnd
 viel drauff wenden/wil mir Gott helffen/vnd mich aus
 diesem Creutz oder Kranckheit erretten/so kan Ers eben
 so wol thun/wenn ich nichts gebrauch/als wenn ich vil
 gebrauch ic. Wer nun/sage ich/solchs thut/vnd ordent-
 liche Mittel verachtet/der versuchet Gott/welchs Er
 ganz ernstlich verboten/Deut:6. daß man nemlich Ihn
 ja nicht versuchen soll/was Er thun könne oder wolte:
 Exod:17. Gleich wie die Kinder Israël Ihn versuchten zu Massa,
 ob Er ihnen könnte Wasser aus den Felsen geben. Hette
 es Christus nit auch thun können/do Ihn der Teuffel
 auff die Zinnen des Tempels zu Jerusalem gestellet/vñ
 wolte haben/Er solte sich darvon hinab lassen/hette/
 sag ich/Christus nicht auch sagen können: Wolan/ich
 wills wagen/will mich mein Himlischer Vatter erhal-
 ten/so wird ers wol thun: Aber Nein/weil er ordentli-
 che Mittel vor der handt hatte/als stiegen vnd treppen/
 so wil Er derselben gebrauchen/vnd spricht zu dem Teuf-
 fel: Es stehet geschrieben: Du solt Gott deinen HERN
 nicht versuchen. Hette es nit auch der König Hißkias
 thun können? do ihn sein Hofprediger/der H. Prophet
 Esaias lehrte vnd riethe/Er solte Feigen ober seine
 Drüsen legen/so würden sie ihm vergehen oder hailen/
 Hett er nit sagen können: Ey was soll ich lang gebrau-
 chen vnd oberlegen? Gott kan mich sonst wol wider las-
 sen

Deut: 6.

Exod: 17.

Matt: 4.

2.Reg: 20.

sen starck werden/weil Er schon mir durch dich zusagen
vnd verheissen lassen/das Er noch 15. Jar zu meinen vor-
rigen Jaren gethan? Aber Nein/das thut er nicht/son-
dern volget dem getrewen rath des Propheten/da wird
ihm auch geholffen. Darumb alle / so ordentliche
Mittel verachten / versuchen nicht allein Gott / Son-
dern geben sich selbst in gefahr / vnd verderben drin.

Aber gleichwol ordentliche Mittel hin oder her / so Confutatio.
geschicht dennoch was Gott will / wie man denn sihet
vnd erfahrt / das ob man gleich dieselben gebraucht / so
wircken vnd helffen sie doch nit allweg / sondern das von
Gott aufgelegte Kreuz / wehret eben lang / vnd nimbt
täglich zu / zumal wenn es der fromme Gott aufleget /
das es vns zum besten dienen / vñ zu vnserer besserung /
ja Selen seligkeit beförderlich sein soll / wie allenthalb
die Schrift Alten vnd Newen Testaments mit klaren
Sprüchen bezeuget. Können also mit solchen Mitteln
vns nicht recht inn vnd wider das fürfallende Kreuz
vnd Trübsal schicken.

Aber der H. Apostel lehrt vns in abegelesenen wor- Propositio.
ten gar fein vnd deutlich / wie wir vns Christlich drein
schicken sollen / das wirs mit Gedult ertragen.

Welches wir nun auch fein nach einander von im hö- Declaratio
& Confir-
matio.
ren vnd vernemen wollen / vnd spricht demnach erstlich:
Vnser Trübsal die zeitlich ist. Vnter dem wört-
lein Trübsal / will er allerley Kreuz vnd Widerwertig-
keit /

Zeit/wie sie heissen mögen/verstanden vnd gemaint haben/dieselben/sagt er/seien zeitlich/das ist/sie weren die leng nicht/senen aufhörlich vnd vergenglich/weren nur ein zeitlang/vnd nemen endlich ihr ende. Vnd lehret der H. Apostel damit/wenn wir vns recht in die Trübsal schicken wollen/so sollen wir bey Leib nit gedencen/das das Creutz immer für vnd für weren werde/kein ende noch auffhörn haben/wie es leider also pflegt zugehen/das die Leut jmer dencken/das Creutz lige zu lang auff ihnen/wie kurz es auch weret/wenns gleich nur ein oder zwen tag weret. Vnd nicht allein gedencen also die bösen vnd gottlosen/sondern auch die Heiligen vnd allerfrömbsten/wie die Exempel der Schrift bezeugen: David der Königliche Prophet/do er in grosser Trübsal vnd Angst stacke/daraus er sich durch Menschliche Hülff/Rath vnd Weißheit nit wircken könnte/so dencket er auch/das Creutz were zu lang/seuffzet vnd gelfset vmb Hilff vnd Errettung zu Gott: Ach H. Erz wie lang wiltu mein so gar vergessen? Wielang verbirgestu dein Antliz vor mir? Wielang sol ich sorgen in meiner Sele/vñ mich engsten in meinē Herzen? Desgleichen: Wiltu denn ewiglich ober vns zörnē/vnd deinen Zorn gehen lassen für vnd für? Wiltu vns nicht wider erquicken? Also klaget vnd schreyet auch die Christliche Kirche bey dem Propheten Esaia: Der H. Erz hat mich verlassen/der H. Erz hat mein vergessen. Haben die Heiligen solche

Psal: 13.

Psal: 85.

Esaia 49.

che Gedancken bey sich gefühlet / so werden sie sich gewiß auch in vns regen / vnd nicht aussenbleiben / wenn vns Creutz oder Trübsal vberfallet vnd betrifft.

Aber dagegen lehret vns Paulus alhier / daß wir die Trübsal weit anderst ansehen sollen / vnd spricht: Unser Trübsal ist zeitlich. Gleich als wolt er sagen: Lieben Corinthher / vnd alle fromme Christen / jr meinet freilich wol / die Trübsal were für vnd für / vnd werde kein auffhör mit jr sein / Aber ich sage Nein dazu / vnd zeuge hier mit öffentlich / daß endlich vnd auffhörlich sey / habe vnd neme jr ende / es stehe vber lang oder kurz an. Denn alles was wir thun / was vns widerfehret / vnd was wir leiden in diesem Leben / das ist alles zeitlich. Ist es denn zeitlich / so ist's trauen auch vergänglich / nimbt ein ende / höret auff vnd vergehet wider. Daraus denn volget / Weil vnser Creutz vnd Trübsal zeitlich ist / daß sie endlich ein mal auch auffhören vnd ein ende nehmen muß. Hat sie denn nun jr ende vnd auffhöre / so kan sie ja nicht langwurig sein / ob sie gleich für vnd für / biß in die Gruben hinein weret.

Diß ist also / meine Lieben / das Erste / daß wir lernen vnd wissen müssen / wenn wir vns recht ins Creutz vnd Trübsal schicken wollen / daß es nemblich zeitlich / das ist / zergänglich vnd nicht langwurig ist. Vnd wenn wir dasselbe sehen von fornen daher schleichen / oder wol mit grosser vngestümme vnd grausamkeit daher stür-

Job: 13.

men/ vnd oberfellt vns denn ganz vnd gar/ drückt vnd
 presset vns/ daß wir kaum davor Athmen können/ so
 sollen wir vns dieser Lehr Pauli erinnern/ gedencen
 vnd sagen: Wolan es mag kōmen/ was nit aussenblei-
 ben will/ Nie bin ich/ es geschehe mir wie der liebe Gott
 will/ Vnd wenn Er mich gleich gar in denselben stecken
 lassen vnd drinnen töden wil/ so wil ich dennoch auff Zu-
 hoffen. Ich weis daß mein Trübsal vnd Creutz zeitlich
 ist/ es wehret nur ein kleine zeit vnd höret wider auff.
 Gewißlich/ meine Lieben/ wer diß thet/ würd sich recht
 schicken vnd verhalten können in Trübsal.

ly.

Matth: 9.

Nie möchte aber jemand also gedencen vnd sagen:
 Wie mag doch Paulus nur ewig für sein Munde
 bringen vnd sagen/ daß die Trübsal nit lang weren sol/
 vnd kurz sen? Ist nit war/ daß man sibet vnd erschret/
 daß manche Kranckheit/ Creutz vnd Widerwertigkeit
 etliche Wochen/ Monat/ ja ein ganzes außlengendts
 Jar vnd noch lenger weret nacheinander/ vnd manchs
 drin gar steckend bleibt vnd verdirbt? wie vns denn ne-
 ben der täglichen erfahrung auch dessen die H. Schrifft
 Exempel fürheltet: Der Evangelist Matthæus sagt/
 daß ein Weib sen gewesen/ welches sich 12. ganzer Jar
 lang habe mit der gemeinen Weiberkranckheit schlep-
 pen müssen. Vnd Joannes der Evangelist/ schreibt von
 einem armen gebrechlichen Mann/ der 38. Jar schwer-
 lich darnider gelegen war. So erschret man noch/ daß
 manchs

Joh: 5.

manchs sein lebtag kein gute Stundt hat / sondern biß
 in sein Gruben hinein seuchelt vnd kränckelt. Soll das
 nun kurz sein / das kan ich nicht glauben / vnd will mir
 nicht eingehen? Antwort / Es deucht vns freilich nach
 vnserm Fleisch vnd Blut das Creutz nicht zeitlich / ver-
 genglich vnd kurz sein / Aber wenn wirs gleichwol
 recht betrachten werden / so müssen wir bekennen vnd
 sagen / daß es gar kurz sey / wenn es gleich die ganze
 zeit vnser Lebens weren solte.

Dem ja vnser Leben an sich selbst kurz vnd zergeng-
 lich ist / wens lang weret / so werets 70. Jar / Ja wens
 hoch kombt / so sindts 80. sagt der Mann Gottes Mo^s Psal: 90.
 ses / welchs doch der hunderste nit mehr erlebet. Solchs
 gibt auch außdrücklich zuverstehen der H. Erk Bätter
 Jacob / do er von seinem liebsten Son Joseph vor den Köⁿ Gen: 47.
 nig Pharao gebracht / vnd von ime gefragt wurde / wie
 alt er were / do sagt er / Er were 130. Jahr alt / die nicht
 allein meisten theils böse / sondern auch wenig / das ist /
 zeitlich vnd kurz weren / vnd weit nicht raichenden an
 das alter seiner Bätter. Job nennets einen Schatten / Job: 14.
 der nicht bleibt / ein Blume die bald abfelle. David
 sagt / Es sey nur einer Hand breit. Ist es nun umb vn^s Psal: 39.
 ser Leben selbst so ein zeitlich vnd kurz ding / Wer wolt
 denn sagen / das Kranckheit / Trübsal / Creutz zc. solten
 lang weren / alldieweil die zeitlich Trübsal ja nit lenger
 weren kan / als das Leben selbs. Ist's nun war / N. L.
 daß

Das auch die zeitlich Freud vnd Bollust/sie wehre gleich
 so lang sie wolte/vns gar kurz deucht/wie sie auch in
 der Warheit ist / vnd man offit gnug erfehret. Denn
 wenn man lang mit grossen vncosten vnd vorhergehens
 der mühe ein eusserliche Weltfreude anrichtet/Ach wie
 bald vnd leicht tregt sich was zu / oder schlegt ein Un-
 glück drein / dadurch sie ganz vnd gar zerstöret wird.
 Daher nit vnbillich das gemeine sprichwort gemacht:
 Es stehe an vber kurz oder lang / So ist Freud Laids
 anfang. Ist denn die eusserliche Freud kurz/ Warumb
 halten wir die Trübsal auch nit für kurz / sie nimbt je
 auch entlich jr ende/sie muß je auch ein mal wider auff-
 hören: Vnd warhafftig/wenn wir die zeitlich Trüb-
 sal gegen der ewigen Freud halten / so können wir nicht
 fürvber / wir müssen bekennen vnd sagen / Es sey die
 Trübsal dagegen nur ein Augenblick / Oder wie ein
 tröpflein kalts Wasser gegen einen grossen Meer.

Syr: 18.

Wer nun dis merckt / der wird sich gewißlich ob dem
 Trübsal/Kranckheit/Creutzr. nicht zu sehr entsetzen/
 sondern sich vielmehr trösten/das es die leng nicht wer-
 de weren/sondern auffhören vnd ein end nemen/Vnd
 mit David in seinen höchsten schmerzen beten vnd spre-
 chen können: Sein Zorn weret ein Augenblick / vnd Er
 hat lust zum Leben/ Des Abendlang weret das wei-
 nen/Aber des Morgens die Freude. Vnd ferners mit
 im singen: Vnd ob es wert bis in die Nacht/Vnd wider
 an

Pfal: 30.

Pfal: 130.

an den morgen/ Doch sol mein Hertz an Gottes macht/
 Verzweiffeln nicht noch sorgen zc. Item: Ob bey vns ist
 der Sünden viel/ Bey Gott ist viel mehr Gnade/ Sein
 Hand zu helfen hat kein Ziel/ Wie groß auch sey der
 Schade/ Er ist allein der gute Hirt/ Der Israël erlö-
 sen wird/ Aus seinen Sünden allen. Vnd Christus
 vertröst vns auch sehnlich vnd spricht: Vber ein kleines Johan: 16:
 so werdet ihr mich nicht sehen/ Vnd aber vber ein fleis-
 nes so werdet ihr mich sehen.

Das Andere/ das wir wissen vnd lernen müssen/
 wenn wir vns Christlich in das fürfallende Kreuz
 schicken wollen/ ist/ das Paulus allhie sagt: Unser
 Trübsal ist leicht. Als wolt er sagen: Lieben Christen/
 ich sage euch/ das nit allein die Trübsal vnd alles Kreuz
 zeitlich/ das ist/ kurz vnd vergänglich ist/ sondern auch
 leicht vnd ring/ so ein schwere vnd vntregliche Last vnd
 Bürd sie euch sonst deucht. Wie? möcht jemand aber-
 mals sagen/ Soll das ein leicht ring ding sein/ wenn ei-
 nes da ligt etlich Wochenlang auff dem Siegbett/ kan
 weder tag noch nacht ruhen vnd schlaffen/ vor grossen
 wehetag vnd schmerzen/ Kan kaum vor schwer des
 Kreuzes den Athem holen/ Oder manchen Menschen
 suchet Gott der HErr mit einem solchen Kreuz haimb/
 das er vermeinet/ alle andere Kreuz seyen gegen seinem
 gar leicht vnd treglich? Ach Gott im Himmel/ soll das
 ein leicht ding sein/ wenn die Eltern ihre hertzliche Kins-
 der/

G

der/

der/die Kinder wider ihre liebe Eltern / Ein Ehemann
 sein herzliebsteß Weib / Ein Eheweib ihren herzlieben
 Schatz / ein guter Freund den andern / sihet ein zeitlang
 schwerlich krank darnider ligen / grosse vnleidenliche
 schmerzen haben / kan ihn weder helffen noch rathen /
 er thue vnd laß sichs kosten / was er nur sol / vnd können
 doch auch weder sterben noch genesen: Oder müssen ent-
 lich zusehen / wie erbärmlich ihnen der Todt mitfahre /
 sie reck vnd strecke / daß es einen stein erbarmen möchte?
 Das ist ja ein schwer Creutz / daß es nicht wol schwerer
 sein könnte / wenn ein Mann sein liebes Weib durch den
 tod / als ein stück von seinem Herzen / Ja sein halber
 Leib / weil Mann vnd Weib ein Leib / gerissen wird?
 Wo hat nur Paulus immer vnd ewig hin gedacht / do
 er diß geschrieben / daß vnser Trübsal leicht sey? Ant-
 wort: Freilich istß / N. L. nicht weniger / daß / wenn wir
 die Trübsal vñ Creutz mit den Augen vnser Vernunft
 ansehen / vnd dieselben drüber zu rath fragen / es an im
 selbs nicht leicht / sondern eben schwer / welches auch oft-
 mals die H. Menner Gottes dermassen gedruckt vnd
 gepresset hat / daß sie gemeint haben / es sey nicht mög-
 lich / daß sie es die leng etwan ertragen könnten / wie wir
 an David / Ezechia / vnd sonderlich am sonst gedultigen
 Job: 6. Job zusehen haben / der sagte: Wenn man mein Jamer
 vnd Leiden zusam̄ in ein Bag legte / so würde es schwe-
 rer sein / denn der Sand am Meer. Ja er wird drüber
 auch

auch so ungedultig / daß er den tag seiner Geburt ver- Job: 3.
 flucht. So gehets / M. L. wenn man mit den Augen
 der Vernunft auff das Kreuz sihet / wie lang / dick /
 breit / gros vnd schwer es ist / wie es nur so hart druckt /
 was für schmerzen es mache ic. Vnd verachtet also des
 H. Geistes regirung vnd Gottes Gnad. Wenn mans
 aber mit den Augen des Glaubens ansihet / so befinden
 wir in der that / daß es den frommen glaubigen Chri-
 sten leicht sey. Denn ob wol quævis Crux vel pas-
 sio, ein jeglich Kreuz an vnd für sich selbst eine straf der
 Sünden ist / daran der Zorn Gottes vnd der zeitlich
 Fluch henger / vnd deswegen dem Gottlosen freilich ein
 dicke / schwere / vnerträgliche Last ist: Jedoch weil wir
 Christen durch das Evangelion in vnsern Herzen ver-
 gewisert sein / daß Christus durch vnd mit seinem Leiden
 den Zorn Gottes gestillet / die Sünde getilget / für vns
 ein Fluch worden / daß Er vns vom Fluch des Gesetzes
 erlösete / (welches freilich / wie jetzt gesagt / ein schwere
 Bürde vnd vnterträgliche Last ist) So ist das Kreuz vns
 nunmehr kein schwere Last / sondern eine leichte Bür-
 de. Daher vns auch Christus so treulich vermanet das
 selb auf vns zunemen / Matth: 11: Nemet auf euch mein
 Joch / vnd lernet von mir / denn ich bin sanfftmütig / vnd
 von Herzen demütig / so werdet jr ruhe finden für ewre
 Seel / Denn mein Joch ist sanfft / vñ meine Last ist leicht.
 Das glossirt der thewere werthe Mann D. Mart: Luth:

B ij also:

also: Das Kreuz ist gar ein leichte Last/denen/die das Evangelium schmecken vnd sülen.

- Lieben/ Warumb hat der H^ER^E Christus auff heu-
 Luc: 20. tigen tag am Delberg blutigen Schweiß geschwitzet?
 Ist nicht darumb geschehen/ daß wir desselben möch-
 ten oberhoben sein/vnd nit ewig vnter der schweren Last
 der Sünden / vnd vnerträglichen Zorn Gottes in der
 Hellen solten vnd dörssten schwitzen. Warumb hat Er
 den bittern herben Kelch seines Vatters getruncken/den
 daß der Kreuzbecher/der vns/wie droben angedeutet/
 in diesem Leben offit draus zu trincken vorgesetzt wird/
 nicht mehr so herb vnd bitter ankommen solte. Hat Er
 nit am Kreuz ganz erbärmlich geschrien: Mein Gott/
 Psal: 22. Mein Gott/warumb hastu mich verlassen. Das wir
 nu mit allen freuden hinzu treten dörsfen/für den Gna-
 Rom: 8. denstul/vnd schreyen: Abba lieber Vater/ sey vns gnä-
 dig ic. Haben wir nicht heut früe in vnser ordinari Pre-
 Elaiæ 53. digt aus Elaiæ gehört/daß Gott der H^ER^E alle vnser
 Sünd/vñ sambt derselben auch alle damit wolverdinte
 Straff/auff ein hauffen/auff Ihn geworffen/wie der
 Prophet klar bezeuget: Er ist vmb vnser Missethat wil-
 len verwundet ic. Item: Die straff ligt auff ihm/auff
 das wir Frid hetten/vnd durch seine Wunden sind wir
 geheilet. Er ist vmb vnser willen am Kreuz gestorben/
 auff das Er vns den Todt vnd alle Kreuz heiligte/daß
 Matth: 27. sie vns nicht mehr schädlich weren. Ja das vns der Tod
 ein schlaf vnd Thür aus diesem Leben in das ewige were.

Und so ein grosser vnterschied ist zwischen einem ge-
 malten vnd rechten Feser oder Kreuz: So grosser vn-
 terschied ist auch zwischen dem Kreuz der Gottlosen/vñ
 der fromen glaubigen Christen. Den Gottlosen ist es/
 wie gesagt/ein vberaus grosse schwere Last: Den Chris-
 ten aber/gar leicht vnd ring. Was machts? Dasz die
 Christen wissen/dasz Christus alle Kreuz mit seinem
 Kreuz geheiliget/vnd in ihren Kreuz erinnern sie sich
 Christi Leiden vnd Kreuz/vnd dencken: Ach sihe/wie
 vil hat Christus vmb meinet vnd der ganzen Welt wil-
 len gelitten/ Warumb wolte ich nicht auch willig vnd
 gedultig das kleine Spreisselein von seinem Kreuz/das
 Er mir jzt auffleget/tragen/ Do Er mir eben mit sein
 Leiden ein Fürbild gelassen/dasz ich in seine Fußstapfen 1. Pet: 2.
 treten/vnd dasselbe auch mit Gedult tragen soll. Ja wil
 ich anderst sein Jünger vnd Nachfolger sein/so muß ich Lucæ 14.
 mein Kreuz auff mich nemen vnd Ihms nachtragen.
 Des erinnern sich fromme Christen/vnd dencken/es
 kan mit Christen hie anderst nicht sein noch zugehen/
 denn wie ihnen jhr HErr vnd Meister zuvor gesagt: In
 der Welt habt jr Angst. Darumb fürchten sie sich nit Johan: 16.
 dafür/sondern wenn es jnen auffgelegt wird/so nemen
 sie es mit aller Gedult auff sich. Die Gottlosen
 aber/wollen vom Kreuz Christi nichts wissen/oder
 halten je nicht viel davon/geschweig/dasz sie glauben
 solten/dasz Er mit demselben alle Kreuz geheiliget. Ir
 G ij Fleisch

Fleisch vnd Blut ist gar zart vnd eckel / rümpffet vnd fürcht sich vor dem Creutz / Do gehets jnen wie den faulen Dinstboten vnd Gesinde / die sich auch vor der Arbeit fürchten vnd nicht gern dran kommen / dencken / es sey ihnen gar zu schwer / es werde jnen gar zu sauer werden / das machts den / das jnen die Arbeit noch so schwer vnd sauer wird / Dahingegen die fleissigen arbeitssamē Dinstboten vor keiner Arbeit sich nicht fürchten / sonder gehen rüstig vnd frisch dran / darumb wird jnen dieselbe auch nicht halb / ja den 3. theil so sauer / als den Faulen.

Exod: 15.

Dessen lesen wir ein feines Vorbild Exod: 15. von Mose vnd den Kindern Israhel / die bey 3. ganzer tag in der Wüsten umbzogen vnd kein Wasser konten finden / damit sie den Durst leschten / biß sie gen Mara kamen / da funden sie zwar Wasser / aber von wegen bitterkeit konten sie es nit trincken. Da fingen sie an wider Mosen zu murren / da weisete Gott Mose ein Holtz / das er in das Wasser thun sollte / damit es süß vnd trinckig würde / Welchs / als ers thete / trancken sie das Wasser / labeten vnd erquickten sich damit. Da ist nun gar fein vorgebildet / das gleichwol vnser Trübsal an sich selbst auch herb vnd bitter ist / darob sich Fleisch vnd Blut schüttelt vnd entsetzet. Wenn aber das Holtz des Creuzes Christi drein gelegt wird / das ist / wenn man sich erinnert vnd tröstet mit glaubigen Herzen des Creuzes Christi / das Er damit vnser Creutz geheiligt / so

so wird es uns auch desto lieblicher vñ leichter zu tragen.
 Wie wirs den aus den Exempel was deutlicher sehen:
 Der H. Apostel Paulus hatte auch sein sonder Kreuz
 vñ Trübsal/ vmb welches willen er drey mal zu Gott
 geflehet vñ gebeten/ daß ers wider von ihm nemen wolte.
 Aber er frigte von ihm die Antwort: Lieber Paule/
 laß dir an meiner Gnad genügen/ Das ist/ tröste dich/
 daß du ein gnädigen Gott hast/ wie es sonstens deines
 Kreuzs halber vmb dich stehet/ ich hab dir nicht böser
 sondern guter Meinung auffgelegt/ damit du dich der
 hohen Offenbarung nicht überhebest/ vñ aus Hoffart
 meine Gnade verschertze. Mein lieber Son Chris-
 tus hat mit seinem Kreuz/ diß vñ alle andere deine
 Kreuz geheiligt/ daß du sie/ wo du anderst wilt/ wol
 tragen kanst. Denn Ich weder dir noch einigen frommen
 Christen mehr auflegen will/ denn er ertragen kan. Da
 wurde Paulo sein Kreuz viel leichter als es zuvor war/
 vñ trugs Christo mit grosser Gedult vñ Sanfftmüt-
 nach. Ist nun/ meine Lieben/ dem also/ wie es in der
 Wahrheit nicht anderst ist/ Ey so last uns nicht über die
 schwer des Kreuzes klagen / Sondern viel mehr die
 Gottlosen/ die hie in diesem Leben im Karn des Trüb-
 sals so lang ziehen müssen/ biß sie einmal vom Tod auß-
 gespannet/ vñ im Wagen aller Trübsal vñ ewigen
 Verderbens eingespannt werden / vñ ewig dran zu zie-
 hen haben.

2. Cor: 12.

1. Cor: 10.

So

So ist gleichwol auch das war / vnd vns vñ nöten zu wissen / dz Gott der Herr oftmaln den seinen die trübsal alhie entweder leichter machet / oder wol gar weg nimt.

Gen: 40. 41. Dem Joseph lindert er sein Gefengnis / Aber entlich errettet Er ihn gar draus / also / daß so tieff Er ihn zuvor gedemütiget / das er eines Kerckermeisters Diener war / so hoch hat Er ihn wider erhoben / daß er der nechst nach Pharao dem König in Egypten gewesen. Dem

2. Reg: 20. König Hiskia halff er aus seiner grossen Kranckheit /

Johan: 11. wie wir droben gehört. Lazarum sein guten Freundt weckt Er wider von toden auff. Also kan vnd will Gott noch den seinen das Creutz lindern oder gar hinweg nemen / daß wir Ihm künlich mögen zutrauen / wie die Schrift allenthalben verheisset. So macht auch das daß Creutz leicht / weil wir wissen / daß Gott getrew ist /

1. Cor: 10. vnd legt vns nit mehr auff / denn wir ertragen können.

Pfal: 91. Ja Er ist bey vns in der Noth / Er will vns heraus reissen vnd zu Ehren setzen / Er will vns treulich helffen tragen / Mit seiner Hülff will ers erjagen / das ewig Himmelreiche. Vnd am Jüngsten tag will Er rhümen / was man den Hungerigen / Durstigen / Nackenden / Krancken zc. gethan habe / daß mans ime bewisen / daß mans Ihm gethan / Darumb / gehts vns nun vbel / so gehts ihm auch vbel. Disem wollet M. L. jr allesambt sein nachdencken / was gilt / alles Creutz vnd Trübsal wird euch nicht schwer / sondern leicht sein / vnd es mit gedult Christo nachtragen.

Was

Was hilffts /möcht jemand sagen / wenn ich diß lang
 weiß / daß das Creutz kurz vnd leicht / wenn ich sonst
 nichts davon haben sol / werde ichs trauen mit geringer
 Gedult auff mich nemen? Wenn ich dannoch auch ein
 Nutz davon haben solte? Wie denn gemeinglich der
 größte hauff so gesinnet ist / vnd sich immer besorgen / sie
 müßens vmb sonst außstehen: Oder etliche gedenccken /
 Es sey ihn das Creutz ein böß anzeigen / Gott hab sie
 damit beladen / daß Er woll damit zuverstehen geben /
 daß Er ihnen feind sey / vnd keine Gnad / weder hie noch
 dort erzeigen wolle. Difen beyden Einreden begegnet
 Paulus auch in diesen kurzen worten / vnd spricht:
 Unser Trübsal schaffet ein ewige / vnd vber alle Maß
 wichtige Herzigkeit. Welches / N. L. das dritte ist /
 das vns Paulus vorschreibet vnd lehret in fürfallender
 Trübsal zugebrauchen / damit wir vns recht drein schick-
 en. Vnd antwortet erstlich denen damit / die sich dün-
 cken lassen / das Creutz sey ein Zeichen der Bngnaden
 Gottes / vnd will sprechen: Wie kan das Creutz der
 Christen ein Zornzeichen sein / weil dasselbe inen schaf-
 fet eine ewige vnd vberschwengliche Herzigkeit. Mit
 den Gottlosen hat es freilich solche gelegenheit / daß das
 Creutz ein anzeig ist des Zorns Gottes wider sie / Vnd
 wo sie vor demselben nicht erschrecken vnd Buß thun / so
 ist gewiß / daß ir Jamer dort erst recht werde angehen /
 do sie in der ewigen Finsternus werden heulen vñ Zeen
 flappen.

Matth: 22.

Prov: 3.
Ebr: 12.
Apoc: 3.

klappen. Aber jr Frommen vnd Glaubigen solt wissen/
 daß das Creutz vielmehr ein zeichen Väterlicher Lieb
 Gottes gegen euch ist. Denn welche Er lieb hat / die
 züchtiget Er. So ist auch gewiß / daß sie euch ein ewige
 vnd vber alle maß wichtige Herrligkeit gebieret. Die
 andern aber / die meinen / als hetten sie nichts davon /
 Vertröstet er hiemit / daß es ihnen Gott reichlich ver-
 gelten werde / Nemlich / mit ewiger vnd vber alle maß
 wichtiger Herrligkeit. Denn ob wol freilich Gott der
 HErr niemands / weder glaubigen noch vnglaubigen /
 nichts schuldig ist / so will Er doch aus lauter Güte vnd
 Barmherzigkeit / als ein milder Vatter / seiner Kinder
 Gehorsamb (den sie im auch im Creutz erzeigen) mit vns
 vergolten lassen. Da solt jr euch aber bey Leib nit trau-
 men lassen / als könntet ihr mit euern Creutz vnd Leiden
 etwan das ewige Leben verdienen / wie im Babstumb
 wider die Schrift fürgeben wird. Nein bey Leib / so solt
 jr nicht gedenccken / Denn das ewige Leben ist vns allein
 durch Christi Verdienst erworben / vnd wird vns aus
 Gnaden / vmb Seinet willen geschencket / Daher auch
 Paulus sagt / daß es ein Gab Gottes sey. Aber gleich-
 wol will der fromme Gott im Himmel vnser Trübsal vnd
 Creutz / so wir hie leiden / aus Gnaden / mit vber alle
 maß wichtiger Herrligkeit belohnen vnd vergelten.
 Denn es heist / vnd ist im auch gewiß / vnd einmal also /
 daß denē / die Gott lieben / alles muß zum besten dienen:
 Vnd

Rom: 6.

Rom: 8.

Vnd wird auch wol daben bleiben/was er an einem andern ort saget/das wir Christen durch vil Trübsal müssen ins Reich Gottes eingehen. Welchen Weg Christus gleich so wol gehen müssen/wie Er selbst bezeuget: Ich bescheide euch das Reich/wie mirs mein Vatter bescheiden hat. Wie es ihm aber bescheiden gewesen/erzelet Er den Jüngern Luc: 24. vnd spricht: Musste nicht Christus solches leiden/vnd zu seiner Herzigkeit eingehen. Vnd das ist eben das/was Paulus saget: Der selbige Kindliche Geist/gibt zeugnis vnserm Geist/das wir Gottes Kinder sind. Sind wir denn Kinder/so sind wir auch Erben/Nemlich Gottes Erben/vnd Mitterben Christi/doch das wir mit leiden/auff das wir mit zur Herzigkeit erhaben werden. Vnd abermal: Das ist je gewislich war/Sterben wir mit/so werden wir mit leben/Dulden wir mit/so werden wir mit herrschen. Volan/möcht jemand gedencken/das ist wol etwas/Ich möchte nun gleichwol gern wissen/wie es sich mit solcher Herzigkeit verhielte? Ob sie auch so kurz vnd gering were wie das Kreuz? Vielleicht weret sie auch nicht lenger als die Trübsal? Darauff antwortet Paulus vnd sagt erstlich: Sie schaffe ein ewige Herzigkeit. Als wolt er sagen: Ach lieber Gott/es ist fast gar keine gleichheit der langwerigkeit halber/zwischen der Trübsal vnd irer belohnung oder Herzigkeit. Es helt sich die Trübsal gegen der Belohnung/gleich wie ein

Actor: 14.

Luc: 22.

Luc: 24.

Rom: 8.

2. Tim: 2.

Chal's beatus

Herrn

D ij Tröpflein

Johan: 16.

Brev. n.

Rom: 8.

1. Cor: 2

Esa: 64.

Apoc: 7.

21.

Tröpflein kalts Wasser gegen ein grossen Meer / wie wir droben gehört. Denn die Trübsal ist zeitlich / die Belohnung oder Herzligkeit ist ewig / das ist / immerwerend / ohn alles auffhören vnd ende / wie Christus selbst vertröstet: Euer Traurigkeit sol in Freud verkeret werden / Vnd ewer Freud sol niemand von euch nemen.

Darnach / damit er vns auch die Gedancken benehmen möchte / als were die Herzligkeit nicht grösser als die Trübsal oder Kreuz / So setzt er hinzu / das sie nit allein ewig weren soll / sondern schaffe auch ein vberaus grosse wichtige Herzligkeit. Als wolt er sagē: Es deucht vns freilich nach vnserm vngedultigen vñ zarten Fleisch vnd Blut / die Trübsal vnd Kreuz auch gros vñ schwer sein / Aber glaube mir drum für gewisz / wenn sie solten zugleich auf ein Bag gelegt werden / so würde die Herzligkeit die Trübsal weit / weit / vnd ober alle mass weit weg wegen. Denn wenn gleich aller Menschen leiden auff einen hauffen zusammen geschmelzt würd / vnd würde gegen der grossen Herzligkeit gehalten / so were es doch nichts dagegen zuachten. Den dieser zeit leiden ist nicht werth der grossen Herzligkeit / die an vns soll offenbar werden. Ein solche Herzligkeit vnd Seligkeit / die keins Menschen Aug gesehen / keins Menschen Ohr gehöret / vnd in keins Menschen Hertz kommen ist. Da wird Gott alle vnser threnē von vnsern augen wischen / da wird kein Leid / kein Geschrey / kein Schmerz / kein Kranck

Kranckheit / vnd kein Todt mehr sein / Sondern eitel
 Freud vnd Seligkeit. Wer diß recht bedenckt / was
 gilts / er wird sein Kreuz vnd Trübsal ihn nicht lassen
 zu schwer düncken / Er wird sein Seel mit gedult fassen
 vnd sein Kreuz dem Herrn Christo desto williger nach-
 tragen. Izt dünckts vns freilich nach vnserer Ver-
 nunfft nur ein Sagrament sein / Aber wenn wir einmal
 durch den Todt darzu hindurch dringen / vnd in der that
 derselben genießten / so werden wir erfahre / was für thö-
 richte Leut wir hie gewesen sein / dz wir in diser Welt vn-
 ter dem Kreuz vns so vngedultig erzeiget / vnd nicht vil
 mehr auff die ewige vnd ober alle maß wichtige Herzig-
 keit gesehen / den eben auff's Kreuz vnd seine schmerzen.

Ach das ist ein schöner hertzlicher Trost / Aber lieber
 sagt mir / Wer hat sich desselben anzunehmen? Gehet
 er alle Menschen an / die Gottlosen so wol als die Gott-
 seligen? Das lehret vns Paulus auch gar fein deutlich
 vnd sagt: U N S / die wir nicht sehen auff das sichtbare /
 Sondern vnsichtbare etc. Vnd will so viel sagen: Lieben
 Corinthen / vnd alle frome Christen / was ich izt gepre-
 digt hab von der Belohnung der Trübsal / das haben
 sich die Gottlosen durchaus nicht zu freuen / sie dörfen
 sich auch nicht drauff versperren noch verlassen. War-
 ists / daß sie freilich auch werden ihre Trübsal voll auff
 vnd gnug haben / Aber dieselbe wirckt oder schaffet gantz
 vnd gar keine Herzigkeit / sondern ist ein straf der Sün-

*L. v. ...
 ...*

Lucæ 8.

Matth: 6.

den/ vnd ein anzeig des Zorns vnd der Bngnaden Gottes. Warumb? Denn sie sehen auff das sichtbare/das ist / auff's zeitliche / trachten nur nach zeitlichen Hab vnd Gütern / Reichthumb vnd Bollust dieser Welt/ trachten nicht einmal nach dem Reich Gottes / oder seiner Gerechtigkeit. Wenn sie hie mehl haben / so fragen sie nicht viel nach dem Himmel / Wie auch jener Landsknecht sagte: Man möchte jm leicht was geben/ so wolt er einem sein theil am Himmel lassen. Solche gott- vnd rochlose Leute gehet diese Herzigkeit nicht an/sie bekommen sie auch nimmermehr / Es sey dann / daß sie von irer Gottlosigkeit ablassen/ vnd sich der Gottseligkeit befleissen. Aber die frommen vnd Gottseligen gehet solche Herzigkeit an / denn sie sehen auff das Unsichtbare/das ist/auff das Ewige/ das ist/ sie lassen ihn ihz Heil vnd Seligkeit angelegen sein / Trachten darnach wie sie dieselb in vnd durch Christum erlangen mögen. Vnd ob sie freilich auch wol in dieser Welt leben/ setzen sie doch jr Datum nicht auff's zeitliche / wie die Gottlosen/sondern richten all jr sachen dahin/daß sie diese ewige vnd vber alle maß wichtige Herzigkeit vberkommen mögen. Sie wissen sich auch hie in diesem leben drein zu schicken/also/daß wenn es ihnen hie auff Erden wol gehet/so dancken sie Gott dafür/mißbrauchens nicht/ werden nicht geil vnd sicher/wie es sonst gehet vnd heist: Es müssen starcke Bein sein / die gute Tag ertragen können.

können. Nein/ sondern sie erinnern sich dabey/ es sey
alles nur ein schein der ewigen vberschwenglichen Herz-
lichkeit / Nach der haben sie verlangen / des trösten vnd
freuen sie sich. Ist's denn sach daß es ihnen vbel gehet/
so werden sie drum nicht vngedultig/ kleinmütig oder
verzagen/ sondern sehen abermal auff die zukünfftige/
ewige vnd vber alle maß wichtige Herzigkeit/ mit wel-
cher sie alles Creutz/ Trübsal/ Angst vnd Noth/ so sie
in disem Leben haben müssen außstehen/ reichlich wer-
den ergetet werden.

Vnd also höret jr nun/ meine Lieben/ wenn wir vns Conclusio
recht in die fürfallende Trübsalre. schicken wollen/ Doctrinae.
So sollen vnd müssen wir wissen/ daß sie zeitlich/ kurz vnd
zergeriglich / vnd dazu leicht sey/ vnd schaffe ein ewige
vnd vber alle maß wichtige Herzigkeit.

Das wollet jr allesambt Junge vnd Alte/ Edle vnd Applicatio.
Vnedle/ wol zu Herzen nemen / vnd nimmermehr ver-
gessen/ vnd im Creutz euch darnach richten. Denn jr je
selbst zuerachten/ daß es Gottes will sey/ vnd es vō vns
wolte gehabt haben/ weil ers durch Regierung des H.
Geists vom H. Apostel Paulo vns hat lehren lassen/ vñ
eben darumb wirds vns noch heut zu tag fürgehalten.
Wo es sein Bill nicht wer/ so würde es wol verblichen
sein. So haben wir droben gehört/ daß vns Christus be-
sület/ sein Joch des Creuzes auf vns zu nemen/ vnd mit Matth: II.
aller Sanfftmüt vnd Demüt des Herzens zu tragen.
Werden

Werden wirs thun vnd folgen / En so wird gewiß auch das vns werdē / was vns Paulus hie versprochen / daß wir ein ewige vnd vber alle maß wichtige Herzigkeit dafür bekommen mögen / vnd alles Creutz / wenns gleich so lang / breit / dick vnd schwer ist / desto leichter vnd gedultiger zu tragen werden. Wo wir aber nit folgen / so ist gewiß / das einen solchen es schwer gnug werden wird / vñ in gar zur Hellen drucken / do er der vberschwēglichen ewigen Herzigkeit wol darben / vnd in Ewigkeit entberē muß. Ja / ich wolte es wol gern thun / weñ ich nur könnte? Fleisch vnd Blut ist frenlich wol gar zart vñ eckel / will nichts dulden noch leiden. Aber bitte Gott / daß er dir seinen H. Geist verleihen vnd geben wolle / der solches alles in dir wircke / der hat sich auch versprochen vns denselben zu geben / wie Christus spricht: Wie viel mehr wird mein Himlischer Vatter den H. Geist geben / denen / die ihn darumb bitten. Darumb lernetz ben zeit / vnd richtet euch darnach / so werdet jr ben euch selbstn befinden / das war ist / was Paulus jzt vns vñ der Trübsal berichtet. Wie wir denn auch an der Edlen vnd Viltugentsamen Frau Tössin / nunmehr in Gott ruhend / vermerckt vnd gesehen / wie Gott durch den H. Geist alles / was Paulus hie mit Worten gepredigt / in der that gewircket vnd practicirt, daß sie damit auch ire grosse schmerzē verbissen / mit grosser Gedult getragen / vnd durch seine Gnad endtlich gar überwunden hat.

Wann

LUC: II.

W Ann aber / meine Lieben / der Königliche Prophet David vns vertroestet / daß des Gerechten nimmer sol vergessen werden. Vnd Syrach vermanet / daß man berühmte Leut loben soll. Vnd der Geist des Herx spricht in der Offenbarung Joannis: daß den Todten ihre Werck nachfolgen. So ist in der Christlichen Kirchen / die gewonheit auffkommen / daß man bey Leichbegengnis / oder Begrebnis Fürnemer Gottseliger Personen / neben Lehr- vnd Trost Predigten / der Verstorbenen Historien vnd Lebens lauff / vnd sonderlichen ihre Tugenden erzelet hat.

Pfal: 112.

Syr: 44.

Apoc: 14.

Solche Löbliche gewonheit der Kirchen / wollen wir zu diesem mal auch halten / vnd vnserer wolselig verstorbenen Fraw Tössin Lebenslauff kürzlich erzelen. Euer Lieb wol sich noch ein wenig dabey gedulden.

Vnd ist nun die in Gott ruhende Fraw Tössin / auß dem sehr Alten vnd Löblichen Geschlecht der von Tettaw geborn / Ihr Vatter ist gewesen / der Edel / Gestrenge vnd Ehriweste Joachim von Tettaw zu vnd vff Schilbach / Ihre Mutter ist gewesen / die Edle vnd Viel Ehri tugendsame Fraw Catharina ein geborne von Spiegel.

Von disen beeden Adelichen Personen ist vnserer wolselige Fraw Tössin geborn / do man geschrieben 1553. Vnd hat eben auch so lang gelebt / nemlich 53. Jahr. Diese ihre Eltern haben sie in aller Adelichen Tugenden / in der Zucht vnd Bermanung zum Herx zuerziehen sich nichts erwinden lassen / Sie auch / die selige Fraw Tössin / hat selbst in ihrer Jungfrawschafft / sich in Gottseligen vbungem / vnd allen Jungfräwlichen Adelichen Tugenden der massen verhalten / daß ihr Jederman holdt vnd gönstig gewesen.

Ephes: 6.

Als sie nun erwachsen / vnd zum H. Ehestandt tüglich / hat gegenwertiger Hochbetrübtter hinderlassener Wittwer / der Gestrenge / Edel vnd Ehriweste Woff Topf zu Wolhaussen / mit rath vnd wissen bederseits Eltern / sich mit ihr in Ehegelübnis eingelassen (nach dem sein Gestrenge zuvor durch den zeitlichen tod / sein Erste liebe Haußfraw / ANNA / geborne Marschaltin von Ostheim / mit welcher S. G. nur ¼ Jahr in Ehestandt gelebet / verloren / Vnd darauff 9. ganzer Jahr in Wittibstandt gelebet / welches wol ein wunder / weil ihre ein solche leichtfertigkeit vnter erlichen Eheleuten / daß ehe das ein recht erkaltet oder begraben wird / das andere vberbliebene schon auff ein anders gedeneckt / oder sich darnach vmbsiehet) nach tödlichen Abgang S. G. ersten Adelichen Haußfrawen / hat sie mit der wolseligen verstorbenen Fraw Tössin / ihr Ehelich beylager gehalten / do man geschrieben 1576. jar / im Herbst am tag Willebrodi. Vnd also in einer guten freindlichen Ehe / in die dreysigsthalbe Jahr / bey samen gelebt /

E

gelebt /

Christliche Leichpredigt.

Sap: 4.

gelebt/vnd in derselben 4. Kinderlein mit einander gezeigt/ein Sohn vnd drey
Töchter / das Söhnlein hat geheissen Hans Joachim / hat aber lenger nicht
gelebet/den nur 18. Wochen. Denn Gott mit ihme auß diser argen Welt geeh-
let/das es durch böß Exempel zc. nicht möchte verführet werden. Darnach hat
ihnen Gott der Herr ein Tochter beschert / die haben sie Margaretam nen-
nen lassen / welche vngesehrde 21. Jahr alt war / Was sie für ein Christliche
Gotteselige Jungfraw gewesen/ist euch gnugsam bewust/ Dieselbe ist vor 6½
Jahr todes verblichen/vñ jr Leichnam alhie im Chor ehrlich zur Erden bestattet/
vnd zum ewigen Bedechtnus/ein schöner außgehauener vnd gemalter Stein
auffgerichtet worden. In welch Chor vnser selige Fraw Tössi auch begraben
zu werden begert / wie denn jzt nach gethaner Predigt geschehen wird. Das
3. Kind ist auch eine Tochter gewesen/vnd Catharina genennet worden/welche
noch im leben/ Vnser lieber Gott/ erhalt sie ihren Aeltern vnd jzt hochbetrübeten
Herrn Vatter zu trost lang. Dieselbe ist ohngesehrde vor fünffthalb Jahren dem
Edlen / Bestrengen vñnd Ehrenvesten Haußen von zu vñnd vff Kothaw /
vermählet worden. Ihr lezt Kindlein ist auch ein Töchterlein gewesen / vnd
Eva genennet worden/das hat nur 10. Wochen gelebet. Deshalb die selige
Fraw Tössi auch jr Trübsal gnug gehabt: Denn Kinder kommen von Her-
ken / vnd gehen wider zu Herken / vnd machen bisweiln grossen Schmerken.
Vnd diese ihre verstorbene Kinderlein sind alle allhie in der Kirchen begraben.
Achte demnach wol dafür / das sey auch neben andern der Ursachen eine /
Warumb die selige Fraw Tössi jr so oft gewünschet / vnd auch begehret habe/
das wenn sie Gott durch den todt absodern würde/man sie nirgents anders wo
hin begraben solte / dann gen Neukirchen / wann sie gleich vber 10. Meil wegs
von Haus stürbe. Nun der Allmechtige Gott hat sie ihres Wunsch gewehret.

Sie hat auch ihren herklieben Juncfern die ganze zeit ihres Ehestandes
dem Exempel der lieben Sara nach/in allen Ehren halten/Wie herklieh sie ihn
geliebet / wissen alle so vmb sie gewesen / vnd hats oft selbstn mit grossen ver-
wundern gesehen. Wann sein Bestreng etwan ein wenig vbel auff war / hilff
ewiger Gott/ wie greimte sie sich / wie wartet vnd pfeget sie seiner / wie gar ließ
sie sich nichts tawren / das sein Bestreng wieder geholffen wurde. Vnd jzt in
jhr grossen Kranckheit / hat sie stets vor sein Bestreng gesorget. Demnach
da sie Absolvirt / vnd mit dem heiligen Hochwirdigen Sacrament versehen
wurde / vngesehr vor 18. Tagen sagt sie zu mir: Ach wie gerne wolt ich sterben/
wenn es Gottes will were/ weil mehr ein solch arge Welt/ das im süglich eines
das leben nicht wünschen solte? Was ist auch für Freud mehr auff der Welt?
Die Lieb ist fast in aller Menschen Herken erkaltet / Es ist nichts guts mehr in
der

Christliche Leichpredige.

der Welt? Aber es ist mir nur umb meinen lieben Alten Junckern / vnd mein
liche Tochter zc. Ich hab wol ein frommen Junckern an ihme gehabt / Er hat
mir kein böß wort geben so lang ich ihn gehabt. Vnd als sein Bestreng die an-
dere Nacht vor ihrem Ende / wegen des steten wachen / vnd grossen Herßbetrü-
nus / gar hinfellig wurde / daß wir mit S. G. genug zuthun / vnd doch nicht von
ihz weichen wolte / sagt sie zu S. G. Lieber Juncker / habt ihz mich noch ein biß-
lein lieb / so gehet hin vnd legt euch ein wenig schlaffen. Das last mir ein rechte
Ehelieb sein? Vor herßlicher Lieb aller seiner Schmerken vnd Todesangst
(wie wir dan nicht anderst meineten / Gott würde sie damals abfodern) verges-
sen / vnd vor sein lieben Ehegenossen sorgen? Wie sie sich dann auch oft umb
seinet willen viel stercker machte / denn sie war.

Iht zugeschweigen / wie sie ihren Andam S. G. ihren Alten Junckern
befohlen hat / Sein Bestreng zeuget auch von ihz / das so lang sie bey sammen
gelebet / niemals erzörnet habe.

Wie hergegen widerumb S. G. sie treulich gemeinet / vnd herßlich gelie-
bet / haben wir für vnd für / sonderlich aber die zeit ihrer werenden Leibschwach-
heit / auch mit verwunderung gesehen. Wie hoch hat sich nur sein Bestreng
vber sie betrübet / bitterlich geweinet / die Hende gewunden / wissen die / so neben
mir ihnen beygewonet / Auch wie herßlich mit auffgehbenen Henden vnd Au-
gen / seuffhete sein Bestreng zu Gott umb ihre Gesundtheit? Wie gar hat sich
S. G. nichts dauern lassen / wo er nur hörete von Arhney oder Labung. Vnd
weil der wolseligen Frawen / der Trunck nicht schmeckte / hat er bey Tag vnd
Nacht reiten vnd lauffen lassen / wo S. G. nur gehört des ein guter Trunck sein
solte. Ach wie herzliche Labfal hat S. G. ihz verschafft / vnd wo es / nechst Gott /
ohn dieselbe gewesen / acht ich / nach Menschlicher Vernunfft / sie hett es so lang
nicht treiben können. Kein Viertelstundt / ja Augenblick / ist S. G. von ihz ge-
blieben / Ihr selbst treulich gepflogen / mit heben / führen / anstreichen / vnd an-
dern / das warlich ein anderer / weit geringers stands / ein Daber / nimmermehr
sein Weib thete / wie S. G. denn sie das letzte mal im Bett auffgehoben / vnd sie
darauß in Armen angefangen zu sincken / vnd Selig verschieden.

Daß wir also an disen Christlichen Adelichen Eheleuten / ein recht muster
vnd Spiegel / rechter vngeserbter Ehelicher Pflicht vnd Lieb haben.

Wie herßlich sie auch iren Andam / S. G. Ihre Fraw Tochter vnd Enick-
lein geliebet / ist offenbar menniglich / Also / daß S. G. ihz Andam / nicht ein mal /
sondern zum öftermal mit nassen Augen sie beklaget / vnd gesaget: Er habe so
ein fromme Schwieger an ihz gehabt / daß sie ihm nicht ein einig vnschön wort
geben / weil er jr Andam gewesen: Ja wens möglich wer gewesen / daß sie S. G.

Christliche Leichpredigt.

in Augen hette ansehen können / was sie derselben in ihrem Leben liebs vnd guts thun sollen / sie hette es gethan / Welchs je auch alles Lobs vnd Rums werth.

Vnd nach dem sie auch gar wol gewußt / vnd offft bekant / daß sie nicht vmb des zeitlichen willen geschaffen / vnd in dise Welt geborn were / sondern daß sie Gott auß seim Wort lernet erkennen / vnd nochmals ins ewige Leben möcht versetzt werden / so ist sie / wie ich euch alle meine Pfarrkinder zu Zeugen angeruffen habē will / mit iren Herzklieben / aber jzt hochbetrübten Juncfern je gern zu Kirchen kommen / wenn sie anderst nicht abwesent oder krank war / Vnd ist jr allezeit ein treulich Leid gewesen / wan sie gleich erhebliche vrsachen darzu gehabt / daß sie nit in die Kirchen kommen können. Sonsten hat sie wol kein Predigt versäumet. Vnd wenn sie in die Kirchen kömen / so hat sie / wie jr alle gesehen habt vnd wisset / jr Gebetbüchlein in die Hand genommen / vnd fleißig darinnen gelesen / vnd offft so hoch darüber geseufft / daß sich jr Leib beweget. Auff die Predigt hat sie mit sonderm fleiß vnd Andacht gemercket / Daher sie aus irem lesen vnd hören Göttliches Worts jr ein herrlichen Vorrath von Trostsprüchen gesamlet / die sie jr jzt in irem Schmerken / Creuz vnd sonsten / gar wol hat nutz machen können / vnd sich damit auffrichten vnd trösten / also / daß fast kein Trostspruch jr zu trost nit konte angefangē werden / sie wußt in / sprach in selbstē hinaus / oder ja von wort zu wort nach / wie matt vnd schwach sie auch offft war. Ist also zum rechten Glauben an Jesum Christum / auß der Predigt Göttliches Worts kömen / den sie auch zum öfftern mit öffentlicher empfahung des heiligen Sacraments des Leibs vnd Bluts Jesu Christi confirmirt vnd bestieffet.

Das Gesind hat sie neben irem lieben Juncfern / auch treulich zu aller Gottesforcht / vnd zur Kirchen gehalten. Vnd wenn sie heim kömen / jr müssen auff sagen / was sie auß der Predigt gehört vnd gelernet. Vnd haben jzt kein größern vertrauß thun können / dann wenn sie entweder nicht zu Kirchen gangen / oder nichts auß der Predigt gemercket. Sie haben kein mal zum Tisch oder von Tisch gehen dörfen / sie haben denn gebetet / vnd Gott gedancket / wenn auch die Arbeit noch so groß vnd nötig gewesen. Sie auch selbst hat nie gessen / auch jzt in ihrer Kranckheit / sie hab den vor gebetet. Kein mal hat sie sich zu Ruhe begeben / noch auffgestanden / do sie nicht iren Abent vnd Morgensegen gesprochen. Wie ich auch dann jzt in ihrer Kranckheit gesehen / nach dem ich sie berichtet / vnd sie die nacht zuvor nicht schlaffen können / vnd vber etliche stundt sie ein Schlaf ankame / nam sie jr Betbuch / welches sie stets in der krankheit / weiln sie irer mechtig gewesen / neben jr vffm Bett ligent hatte / betete zuvor / vnd befahl sich Gott vnd schlieff darauff ein.

Das H. Ministerium vnd Predigtamt sambt desselben Dienern / hat sie in allen Ehren gehalten / vnd helfen fördern. Do vns
jenes

Christliche Leichpredigt.

Jenes mal ein böser Dube / der seind her zum Hof sein straff mit Feser erlitten /
vnsere Kirchen beraubete / Hat sie zum Altar ein schön grün Teyptich geschickt /
vnd mit ein klaren weissen Tuch geschmücket: Vnd dise tag erst vnsern Tauff-
stein mit einen schönen herzlichen Tuch / wie vor augen / gezieret. Vnd wenig
stund vor iren seligen Abschied / hat sie vnser Gottshaus vnd Kirchen reichlich
bedacht / vnd 40. Gilden zu demselben testirt vnd vermacht. Ach wenn ich sa-
gen solt / wie viel liebs vñ guts / sie sambt iren ikt hochbetrübtten Junckern / mir
vnd den meinigen erwiesen. Wann ich nur ein wenig vbel auff gewesen / ha-
ben sie nicht allein manchen tag wol ein zwey mal herein zu mir geschickt / vnd
sehen lassen / was ich machte / sondern auch / on mein begeren / auß freyer Christo-
licher Lieb / allerley Labung / Wildberdt / Vögel / Vier zc. geschickt. Mein lieber
HERR Jesus Christus / dem sie es gewißlich an mir gethan / bezale es inen hie
vnd dort / 1000. feltig wider. Nicht allein mir hat sie mit irer Labung vnd Arz-
nen gedienet / sondern auch Burgern vnd Bauern / Jungen vnd Alten / Dann
wann jemand bey vns krank oder schwach gewesen / ist alles vmb Rath zu ihr
gelauffen / Hat auch niemand je lehr von ir gelassen / Auch die jenigen / die es
nicht vmb sie verdienet haben / so sie es anders zu Haus gehabt / was sie be-
dorfft / vnd nechst Gott manchen geholffen. Wir werden sie noch viel irz gehen /
wie dann schon ein grosse Klag vber sie geführet wird.

Ihr Handt / den Armen zu geben / ist nie zugeschlossen gewesen / sondern
allezeit offen gestanden / wie ir denn selbst gesehen / daß sie kein mal selbst zu Kir-
chen kómen / oder das Gesind drein geschickt / sie haben vnsern Haus Armen
allhie ein Brod mit ins Restlein dort bey der Thüren bringen müssen. Ja das
wol ein anders vnd mehrers ist / so hat sie vnd ir hochbetrübtter Juncker / nicht
allein viel irer Vnderthanen arme Waisen gar zu sich genommen vnd auff-
zogen / Sondern auch anderer Leuth arme Kinder / so außser iren Gerichten ge-
wesen / vnd inen Kost vnd notturstigliche Kleider verschaffet / wie ich ir zum
theil wol mit namen nennen kónde / vnd zum theil ikt vor Augen. Welches ja
ein rechte Adelige Tugendt / vñnd starcker Beweis ihrer Gottseligkeit vñnd
Glaubens. Summa: Sie ist mit allerley schönen / Adelichen / Christlichen
Tugendten gezieret gewesen / als mit Demut / Bescheidenheit / Gürtigkeit /
Warheit / Fromkeit vnd der gleichen / wie ich denn noch kein Menschen gehört /
der sie nicht Herklich geklaget / vber ihr seuffzet vnd gesagt: Wir haben je ein
fromme Frawen an ir verloren / Sie ist je ein fromme Edle Fraw gewesen / es
ist recht schad daß sie faulen soll.

Christliche Leichpredigt.

Was aber nun schließlichen jr Leibschwachheit vnd Seligen Abschied betrifft / So wissen alle die vmb sie gewesen sein wol / wie sie nun viel Jar hero nach einander vber jr Herk / Matzigkeit vnd Engbrüstigkeit geklaget / daß sie nicht wol eine stigen mehr steigen können / Der Arhem hat jr immer aussenbleiben wollen / bis jr endlich die Füße / *salua reuerentia*, angefangen vor einem viertel Jar / hefftig zugeswellen / welche Geschwulst sich von tag zu tag gemehret / das sie die leng nicht mehr vber die Stuben gehen können / betrieß worden / vnd endlich jr gar in Leib hinauf getreten. Vnd als sie vermerckt / daß die leng vnd fern jr die Geschwulst nicht recht thun würde / Hat sie nach den trewen

Syr: 38.
Matth: 10.
Rom: 8.
1. Cor: 10.

Rath Syrachs / mich vnwürdigen Diener Christi zu sich fordern lassen / Ir die H. Absolution an Gottes stadt anzukündigen / vnd das H. Abendmal zu reichen. Als ich erschinnen / hat sie gern bekennet / daß jr dieselbe / nach dem allein guten Willen Gottes widerfahren / der jr sie auch zum besten auferlegt / Wüste auch / daß Er so getrew were / daß Er ihr mehr nicht auferlegen würde / dann sie ertragen köndte / Vnd mit derselben zu seiner zeit / ein besser Endt machen / als sie irs iht wünschen köndte. Darauff sie alles Befind / so vorhanden war / angesprochen: Ir Mägd / hab ich euch was gethan / so vergebt mirs. Mich deucht / wenn ich mich allenthalb recht vmbsehen köndte / es soltens wol etliche lachen / oder das Maul darvber auffwerffen. Aber Warlich mit allen Ehren wird es jr nachgesagt / vnd Christlich nachgethan. Denn laßt mir diß ein rechte Christliche Adelige Tugend / vnd grosse Demut von einer Adelsperson sein / welchs freilich wol kein Bauer oder Mägd thun solte / die sich viel zu gut dazu solten düncken lassen / Ja so stöckisch sein / daß sie meinten / es were inen ein auffheben / wenn sie Herrn vnd Frawen vmb Verzeihung bitten solten.

Matth: 6.
5.
18.

Was nun Christliche Herzen sein / die vernemen hiraus / was für ein Christlich Gottseligs Herk / vnser wolselig verstorbene Fraw Tössin gewesen / wie treulich sie Christo gefolget / do Er vns lehret täglich beten: Vergib vns vnser Schuld / als wir vergeben zc. Wie sie sein Gebot Matth: 5. nachkommen / daß wenn wir vnser Gaben auff den Altar opffern zc. Ja wie sie die schrecklich Straff / so Gott den vnversönlichen droet / wo sie iren Brüdern nicht von iren Herzen vergeben / vor augen gehabt / Vnangesehen / daß jr ire Dinstboten alls guts nachsagen.

Mit was herglichen seuffzen vnd threnen / wie sonst auch allezeit / sie drauff ihre Confession vnd Beicht there: Deßgleichen auch mit was sonderlicher
reuerents,

Christliche Leichpredigt.

reverents, vnd grossen verlangen sie das H. Abendmal empfangen / haben alle gesehen / so zu gegen gewesen / vnd müßens neben mir bezeugen. Ach wie herzlich danckte sie Gott für das H. Abendmal / ehe sie dessen erinnert wurde. Denn do ich noch mit verwarung des H. Geräths / so zur Administration desselben gehört / vmbging / fieng sie vberlaut an zusagen: Ich dancke dir O treuer Gott von grundt meines Herzens / daß Du mich jzt abermals mit der heissamen Speiß des Leibs vnd Bluts deines lieben Sohns Jesu Christi erquicket hast zc. Dir O Barmherziger Vatter sey Lob vnd Danck gesagt / daß ich abermals mit dir außgesöhnet bin / Mache es nun mit mir / wie Du wilt / so will ich auch / Dein Will ist der beste. Die Seel ist nun mit Christi Leib vnd Blut gespeisset / getrencket / gelabet vnd erquicket. Mein lieber Gott wirds mit dem Leib vnd seiner schwachheit zu seiner zeit auch wol machen zc. Vnd hat sich also ganz vnd gar in den gnädigen Willen Gottes ergeben.

Darnach hat sie auch dem lieben Syrach gefolget / daß sie den Arzt zu jhr kommen lassen / seins Raths gepflogen vnd ihm gefolget / Welcher zwar / wie wol nit gegen jhr / sondern gegen andern sich vernemen lassen / all Menschliche Hülf / were mit jr aus / denn sie mit drey tödtlichen Krackheiten beladen / als mit der Wassersucht / Schwindtsucht vnd schwarzen Gelsucht. Doch jr etliche Labfal vnd Arkenen verordnet / jr die schmerken etlicher massen zulindern. Aber weil zeit vnd stundt ires Abschids vorhanden / hat sie müssen practicirn / was im Buch der Weißheit geschrieben stehet: Es heilet weder Kraut noch Pflaster / Sondern HERR dein Wort / welches alles heilet. Derhalben / als sich die Kranckheit fast stündtlich mehrete / vnd sie wol merckte / daß Gott mit jr aus diser Welt eilerte / hat sie sich aller weltlichen Hendl verzigen / vnd aus Gottes Wort des Verdinsts Christi getröstet / vnd nach dem Himlischen Vatterland verlangen gehabt / Oftmals die Augen empor gehoben / Vnd als sie von irer Neterin einsmals gefragt / worden / Warumb sie vbersich sehe? Hat sie jhr zur antwort geben: Laß mich gehen / gönneß du mir die ewige Seligkeit nicht? Daraus ja leichtlich abzunemen / mit mas gedanken sie vmbgangen / wenn sie vor dem Schmerken ein wenig ruhe gehabt. Desgleichen auch / wenn sie die Husten vnd stechen der Seiten / davon sie gar grossen schmerken hatte / sehr abmarterte / vnd ein wenig nachließ / so schrie sie: Arwe Mein lieber HERR Jesu Christus / mein Seligmacher vnd Erlöser kom vnd hilff mir / lindere mir meine schmerken zc. Wenn ich nur Dich hab / so frag ich nichts nach Himmel vnd Erden zc. Ich hoffe aber darauff / daß du so gnedig bist / Mein Herr streuet sich /

Sap: 16.

Pfal: 73.

13.

E iij

daß

Rom: 14. daß Du so gern hilffest. Mein lieber HERR Jesu Christo / Dir lebe ich / Dir
 Job: 13. sterbe ich / Dein bin ich / todt vnd lebendig. Wenn mich gleich der HERR auch
 tödten wird / Dennoch will ich auff Ihn hoffen. Vnd was dergleichen mehr
 war / Daraus abzunemen / was ihre gedanken in ihren Schmerken gewesen.
 Wann sie auch gefragt wurde / wie sie sich befinde? sagte sie: Ich hab mein
 Sach zu Gott gestellt / der nachs mit mir wies Ihm gefelle. Item: Wie mein
 Gott will / so will ich auch / sein Will ist doch der beste. Ja wenn sie in ihren
 größten Schmerken vermanet wurde / sich auff Christum zuverlassen / Sagte
 sie allezeit: Ach wenn ich Den nicht hette / was wolte ich machen ic. Alles was
 sich sonst in irer Kranckheit begeben / würde iht zuerzelen zulang werden.

Sonnabends vergangen / ohne geverd vmb 4. Uhr nach Mittag / als ir
 der Athem immer was kürker werden wolte / hat sie sich zum seligen Abschied
 auch mit bereitet / alle Trostsprüch vnd Sterbgebetlein / so ir vorgehalten wor-
 den / von wort zu wort laut vnd vernemlich nachgesprochen / wolte auch nicht
 mehr leiden / daß man sie sehr anstreichen solte / Aber oft vnd viel mit David /

Pfal: 31. dem HERRN Christo / vnd Stephano gebetet: **Meine Seel / HERR /**
befehl ich dir in deine Hand / Du hast mich erlöst / Du
 Luc: 23. **treuer Heiland. Vatter / meinen Geist befehl ich dir in**
 Act: 7. **deine Hand: HERR Jesu / nimb meinen Geist auff.**

Nach einer stundt vngeserd / begerte sie (wie denn francke Leut pflegen zuthun)
 man solte ihr ein ander Bett in die Stuben schlagen / Verhoffend / was besser
 drinn zu ruhen. Welchs sich was verzogen. Aber als es hinein geschlagen / vnd
 sie drein gelegt wurde / nahete das selige Stündlein immer näher herben / der-
 halb sie alle Trostsprüch / so ihr vorgehalten wurden / aber nachsprach / auch
 von ir selbst / wie die vergangene Nacht / das schöne Trostgebetlein des Hochge-
 lerten Pauli Eberi: HERR Jesu Christ war Mensch vnd Gott ic. Item:
 HERR Jesu Christo / Mein Zuflucht bist ic. Mein HERR Jesu / Dir
 leb ich / Dir sterb ich ic. von wort zu wort allein gebetet. Nach solchen / hat
 sie kaum ein halbe Stundt vor ihrem Seligen abscheiden / zu zweyen maln
 ihrem lieben Ahdam / Seiner Bestreng / ihre liebe Tochter trewlich bevoh-
 len / mit ganz verstendigen sehnlichen worten / Er solte sich / wie ein Ehrlich
 Mann / als er bisher gethan / gegen ihr verhalten. Sie die Tochter verma-
 net sie gleichsfalls aller gebür nach sich gegen ihren lieben Juncker zuerzeigen /
 wie

Christliche Leichpredigt.

wie sie dann bißher von ihr dahin geweißt / vnd sie selbst von ihr gesehen. Sie sollten ja ihre Kinderlein in aller Gottesfurcht auferziehen / vnd sein beten lernen lassen. Vnd dann bat sie nachmal / S. G. wolte ihm iren alten herzklieben Juncfern / der vor grossen Herckenleid bitterlich weinete / (wie zwar auch wir alle) vnd nicht wuste / was er thun solte zc. lassen treulich befohlen sein / Er würde jnen kein schad sein zc. Welches wolgedachten Bestrengen Juncfern dem von Kohan so wol gefallen / daß sein Bestreng zu etlich malen zu mir gesagt: Er wolte es nicht für viel 100. Gilden nemen / daß sie jme die iren so treulich befohlen / Er wolte allem treulich nachkommen. Daraus zu sehen / was für ein verstendig / Gottselig Herz die iren an jr gehabt / Aber leider nunmehr ein zeitlang verloren. Darauff befahl sie / wenn sie würde sterben / solte man sie sein sauber abwaschen. Item / was man jr für Kleider anzihen solte. Vnd befahl sich abermals Gott treulich.

Nach solchen begerte sie / wir Mannspersonen solten ein wenig entweichen / sie wolte auff. Als solchs geschach / jr aber von iren Wärterinnen einer widerraden wurde / Sie solte sich ja nicht auffheben lassen / denn sie jnen vnter den Händen vergehen möchte. Hat sie geantwortet: Wolan / Ich bin meinem lieben Gott einen todtschuldig / Ich muß auff / Will mich mein lieber Gott jht habē / so bin ich bereit vñ willig dazu. In dem hat sie sich mit bedenen Armen irem lieben Juncfern vmb den Hals geschlungen / vnd ist also auffgehoben worden. Vnd als sie / sie aus dem Bett bracht / ist sie dahin gesunken / da jr Bett vnter geworffen / vnd sie drauff nider gelassen worden. Vnd als mir geschrien wurde / vnd ich jr zuruffete / Ob sie auff Christus iren Erlöser zc. sterben wolte / That sie iren Mundt auff / als wolte sie Ja sagen / vnd dann denselben wider sittiglich zu / wie alle neben mir bekennen müssen / so dabey gewesen. Vnd drauff ist sie in einigem vngewerdigen Zeichen / sanfft vnd selig in Christo eingeschlaffen / daß sie nicht ein Aug verwendet / noch den Mundt gekrimmet / oder einigem Fingerlein gereget.

Ist also an jr war worden / was Christus vns vnlängst im Evangelio versprochen: **Wahrlich / Wahrlich / Ich sage euch / wer mein Wort wird halten / der wird den Todt nicht sehen oder schmecken ewiglich.** Denn sie je des Todtes bitterkeit nicht gefühlet / Sondern ehe sie sein gewar worden / gar sanfft durch Jhn zum ewigen Leben hindurch

Johan : 8.

Christliche Leichpredige.

Händurch drungen/vnd hat nun in der That/was Paulus ihz vnd allen glaubigen Christen in abgelesenen Worten verheissen / Nemblich: Für ihz zeitliche/vnd nunmehr vergangene Trübsal / ein ewige vnd vber alle maß wichtige Herzlichkeit.

Dessen sich der Hochbetrübt Adeliche Wittwer/Mydam/Tochter vnd alle andere Angewandten von Herzen trösten / vnd wissen sollen / daß da kein widerbringen / Sie haben sie drum nicht verlohren / sondern nur vorhin geschickt/vnd ist in ein solch ort kommen/do sie nicht die ganze Welt neme/vnd begerte nur wider zukommen.

Pfal: 1. Wir aber in gemein allesamte / Edele vnd Vnedele / sollen ihrem Exempel nach/Gottes Wort lieb haben / gern lesen/hören / davon reden / vnd Tag vnd Nacht damit umbgehen / auff daß wir drauß im fall der not Lehr vnd Trost haben mögen / Denn der Todt kombt vns doch gleicher weiß.

Es wünscht im manches offtmals auch ein seliges Stündlein/Wems Ernst ist vnd gern haben will/der halt Gottes Wort lieb/höre vnd lerne es gern/thue auch darnach/ so wird er gewiß/ er sterbe wenn/ wie vnd wo er wolle/den Todt nicht sehen ewiglich.

Die aber Gottes Wort verachten / sind darneben rohe/wilde/wüste Leut/ leben nach irem willen / die sterben wenn sie wollen / so kombt sie der Todt sauer an / vnd fahren dahin / do sie nicht wollen. Denn ob wol die Gnadenthür rechten Büßern nie zugeschlossen / wie auch der Schecher in letzten Zügen zu gnaden angenommen/ so solls doch keiner drauff wagen / denn istts diesem geschehen/dem hundersten geschichts nicht mehr. So ist auch ohne das sehrlich vnd mißlich am letzten End / wenn die Seel aufffahren will / die Leut aus Gottes Wort zuvnterrichten/ zu ein seligen Abschied / Zugeschweigen / daß manchem das trumb gar zu kurz wird. Darumb soll Jederman bedencken die schönen wort im Gesang: Kombt her zu mir spricht zc.

Gern wolt die Welt auch selig sein/

Wenn nur nicht wer die schwere Pein/

Die alle Christen leiden:

So kan es anderst nicht gesein/

Do geb sich nur gütlich darein/

Wer ewig Pein will meiden.

Item:

Die Welt erzittert ob dem Todt/

Wenn einer ligt in d letzten Not.

Denn will er gleich fromb werden:

Einer

Christliche Leichpredigt.

Einer schafft diß/ der ander das/
Seine armen Seel er ganz vergas/
Die weil er lebt auff Erden.

Vnd wenn er nimmer leben mag/
So hebt er an ein grosse Klag/
Will sich erst Gott ergeben:
Ich fürcht fürwar die Göttlich Gnad/
Die er allzeit verachtet hat/
Wird schwerlich ob ihn schweben.

Der Allmechtige Gott/der ein Gott ist alles Trosts/wolle durch den heiligen Geist / den Hochbetrübtten Wittwen / Andam / Tochter / vnd die ganze Adelige Freundschaft trösten / Ihnen allen langwirige Gesundheit vnd Leben verleihen / vnd vor fernern Leid vnd Bekümmernus Väterlich bewahren / Vnd endlich vns allen zugleich / wenn auch vnser Abschieds zeit herben rucket / ein seligs Stündlein bescheren / mit Gnaden auß diesem Jammerthal zu sich nemen / vnd die ewige vber alle maß wichtige Herrlichkeit vnd ewige Seligkeit widerfahren lassen / Amen / Amen / Amen.

Fides victoria nostra.



FINIS.

Zf 1235

OK

Faint, illegible text, possibly bleed-through from the reverse side of the page.

WAP

M.C.



QK. 325, 2.

v. C.



Christliche

Bev der

nis/ der Edlen v

gensamen Fräwen S

von Ledaw/ Des auch G

vesten Wolffen Tossen

liebten Haußfräwen

vmb s. Vhr/ an

Christo S

schl

Gel

Zu Neufkirchen/

1600

M. Nicolaum

Pfarre

Gedruckt zum H

Pfeilschmidt

